



RESOLUCIÓN POLA QUE SE FORMULA O DOCUMENTO DE ALCANCE PARA A AVALIACIÓN AMBIENTAL ESTRATÉXICA ORDINARIA DA MODIFICACIÓN DO PLAN PARCIAL DO SUD-16 AGRA DOS CAMPOS-ARÍNS, CONCELLO DE SANTIAGO DE COMPOSTELA

Promotor: Fomento de Iniciativas Inmobiliarias, S.L.
Órgano substantivo: Concello de Santiago de Compostela
Expediente: 2019AAE2380
Código web: 2246/2019

Con base na proposta de resolución do Servizo de Avaliación Ambiental de Plans e Programas, da Subdirección Xeral de Avaliación Ambiental, que a continuación se transcribe:

ANTECEDENTES

1. O concello de Santiago de Compostela dispón dun Plan xeral de ordenación municipal (PXOM) que foi aprobado parcialmente o 03.10.2007 (DOG 22.10.2007) e definitivamente o 01.09.2008 (DOG 24.09.2008).
2. O Plan parcial do sector de solo urbanizable delimitado SUD-16 "Agra dos Campos-Aríns" foi aprobado definitivamente o 27.03.2015 (DOG 05.06.2015).
3. O día 24.09.2019 a Dirección Xeral de Calidade Ambiental e Cambio Climático recibiu un escrito do Concello de Santiago de Compostela no que solicita iniciar o procedemento de avaliación ambiental estratéxica simplificada da *Modificación do Plan parcial SUD-16 Agra dos Campos-Aríns*, ao abeiro da Lei 2/2016, do 10 de febreiro, do solo de Galicia. Achega o documento ambiental estratéxico e o borrador da proposta.
4. O día 26.09.2019 acórdase someter o documento ambiental estratéxico e o borrador da modificación, a un período de consulta pública durante un prazo de dous meses na sede electrónica deste órgano ambiental. Ao mesmo tempo consultouse ás administracións públicas afectadas.
5. No informe ambiental estratéxico da devandita modificación de plan parcial, emitido por este órgano ambiental, concluíuse que debía someterse ao procedemento ordinario de avaliación ambiental estratéxica.

CONSIDERACIÓNS LEGAIS

1. A Lei 2/2016, do 10 de febreiro, do solo de Galicia, integra no procedemento de aprobación dos instrumentos de planeamento urbanístico o proceso de avaliación ambiental estratéxica previsto na Lei 21/2013, do 9 de decembro, de avaliación ambiental. A través do Decreto 143/2016, do 22 de setembro, aprobouse o regulamento da citada Lei do solo (RLSG), e mediante Orde do 10 de outubro de 2019 aprobáronse as normas técnicas de planeamento urbanístico de Galicia (NNTTPP).
2. O artigo 46.1.d) da Lei 2/2016 sinala que deben someterse ao procedemento de avaliación ambiental estratéxica ordinaria os plans obxecto de avaliación ambiental estratéxica simplificada cando así o decida o órgano ambiental no informe ambiental estratéxico.
3. O artigo 31.2 a) da Lei 21/2013, establece que o órgano ambiental -unha vez resolta a emisión do informe ambiental estratéxico- notificará esta decisión ao promotor xunto co documento de alcance do estudo ambiental estratéxico e o resultado das consultas realizadas, para que continúe coa tramitación do procedemento de avaliación ambiental ordinaria.





4. A Dirección Xeral de Calidade Ambiental e Cambio Climático ten atribuídas as funcións en materia de avaliación dos efectos de determinados plans e programas no ambiente (Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda).

CONSIDERACIÓNS TÉCNICAS

1. Ámbito de actuación e principais características ambientais

O termo municipal de Santiago de Compostela sitúase na comarca de Santiago e na zona centro-sur da provincia da Coruña, contando na actualidade cunha poboación de 96.405 habitantes (IGE, 2018) e cunha tendencia xeral lixeiramente ascendente.

Os terreos obxecto da modificación atópanse na valgada entre o Monte do Gozo e o Monte do Viso, na periferia leste da capital municipal. Lindan polo norte co sector de solo urbanizable SUD-17; polo leste coa rúa de San Martiño e con áreas residenciais de baixa densidade; polo oeste coa autoestrada AP-9 e unha zona de solo rústico de interese paisaxística; e polo sur con áreas de solo rústico de protección agropecuaria e forestal e cos núcleos de Sanxuás e A Pena.

O ámbito presenta unha topografía variable con alternancia de terreos chans e zonas de pendentes suaves na zona central e leste, con ramplas máis elevadas no sueste e no noroeste, existindo franxas puntuais con máis de 30%. No seu interior localízanse prados, terras de labor e pequenas masas e sebes arbóreas, así como algunha vivenda unifamiliar, estando practicamente a totalidade afectado pola zona de concentración parcelaria de San Pedro de Aríns.

Os terreos enmárcanse na grande área paisaxística de “Galicia Central” e na comarca paisaxística de “Terra de Santiago-A Barcala” segundo o *Catálogo de Paisaxes de Galicia*, atopándose a 200 metros ao leste a Área de especial interese paisaxístico (AEIP) “Carballeira de Bando”. Trátase dun ámbito moi visible dende o propio Monte do Viso, e de elevada fragilidade visual pola súa posición de fondo escénico do Monte do Gozo.

Nin no ámbito nin na contorna inmediata se insiren espazos naturais da *Rede Galega de Espazos Protexidos* ou da *Rede Natura 2000*, sendo o espazo protexido máis próximo o da Zona especial de conservación (ZEC) “Río Tambre”, a 4km ao norte. No noroeste do ámbito localízase a regueira de Fontela, que continúa polo sector lindeiro SUD-17, e que no tramo non canalizado aínda conserva vexetación de ribeira asociada.

Nos terreos obxecto da modificación non se localizan elementos de valor patrimonial, se ben a 250 metros ao norte sitúase a delimitación do territorio histórico do ben de interese cultural do Camiño Francés, que figura como elemento protexido no Catálogo do *Plan básico Autonómico* (PBA).

O ámbito é lindeiro polo oeste coa autoestrada AP-9, estando parcialmente afectado pola zona de servidume de estradas e polos niveis de inmisión acústica do devandito viario. Por outra banda, o acceso aos terreos prodúcese dende a rúa das Estrelas, que atravesa o sector de noroeste a nordeste, ou dende a rúa de Senande polo sur. Completan a estrutura viaria interior a rúa da Fontela, a rúa da Seitura e a rúa de San Martiño.

Na documentación indícase que existen infraestruturas de abastecemento e saneamento próximas, se ben no propio ámbito non existe rede de sumidoiros, polo que as vivendas existentes resollen o saneamento de forma individual. A este respecto, o informe aportado pola empresa subministradora anticipa que o depósito existente e a EDAR da Silvouta poden presentar problemas de capacidade para atender á nova demanda da proposta.





Respecto doutras infraestruturas, pola rúa de Senande discorre o trazado dun oleoducto, e na marxe esquerda da rúa das Estrelas localízase unha liña eléctrica de alta tensión soterrada, cuxo trazado cruza o ámbito de oeste a este.

Segundo o documento ambiental estratéxico achegado, na contorna do sector existe recollida selectiva de residuos, contando o ámbito con dotacións suficientes de contedores para a realidade actual.

2. Obxectivos do planeamento, alternativas e proposta inicial

A modificación do plan parcial ten por **obxecto** a revisión do plan parcial SUD-16 actual para reaxustar a delimitación do ámbito -eliminando a vivenda existente situada no bordo sueste-, e establecer una nova proposta de ordenación detallada, reordenando a zona baixo criterios de calidade, integración e conectividade peonil e ecolóxica.

Consideráronse dúas **alternativas** de ordenación do ámbito, ademais de alternativa "0" ou de non formulación do Plan. Difírense principalmente na densidade viaria, nos espazos de relación creados, e na distribución nas tipoloxías residenciais.

A **proposta** finalmente adoptada (alternativa 2), reduce o sector establecido polo PXOM de 442.882,23 a 442.063,14 m², divídeo en 3 polígonos para posibilitar o seu crecemento por etapas, e recolle a seguinte zonificación:

- Rede viaria: composta por rúas de tráfico rodado -fundamentalmente as periféricas e a rúa de Seitura- e outras de tráfico mixto residencial de prioridade peonil cun pavimento máis brando. Propóñense carrís bici asociados ás primeiras. A zona de aparcadoiro distribúese de forma equilibrada nos distintos polígonos, e prevense 2 prazas de aparcamento privado por vivenda en superficie ou baixo rasante.
- Equipamentos: distribuídos en varias zonas do ámbito e en xeral vinculados ou próximos ás zonas verdes.
- Espazos libres: afírmase que se localizan en áreas con escorrentas ou de valor ecolóxico, tratando de respectar o arborado de interese existente. Proponse a recuperación do regato existente ao norte, canalizado na meirande parte do seu percorrido.
- Áreas residenciais: prevense 4 tipoloxías de edificación -vivenda colectiva en bloque de altura máxima de B+II, e vivenda unifamiliar illada, pareada ou acaroadada, de altura máxima de B+I-. As vivendas unifamiliares agrúpanse entorno a espazos comunitarios de convivencia, que aloxarán instalacións comúns -composteiros, ortos urbanos, e edificacións auxiliares-.

Detéctanse as seguintes **variacións** respecto á ordenación do plan parcial orixinal:

- Redúcese a edificabilidade total en 11.875,24 m² -un 6,7%- , se ben practicamente se mantén o número máximo de vivendas.
- Auméntase a superficie destinada a espazos libres públicos en 6.272,16 m² -un 8%- e incorpórase a reserva de arborado -1.652 pés- en cumprimento coa LSG.
- Diminúese a superficie destinada a viario rodado en 16.756 m² -un 16%-.

Indícase que se adoptan como **criterios ambientais**, entre outros, a adaptación da proposta á topografía -con viarios apoiados nas curvas de nivel e medidas para resolución de desniveis-; a mellora da integración paisaxística -permitindo a diversidade de tipoloxías edificatorias, favorecendo a continuidade visual e atenuando certos impactos visuais-; a incorporación de medidas de conectividade ecolóxica -como pavimentos brandos e descontinuos nos tramos de rúas que atravesan as zonas verdes-; e a priorización da mobilidade peonil.





Plano da ordenación detallada proposta

3. Consultas realizadas

Durante o período de consultas previas realizadas no procedemento ambiental recibíronse observacións e suxestións por parte do Instituto de Estudos do Territorio, da Dirección Xeral de Patrimonio Cultural, e dun particular, que foron resumidas no informe ambiental estratéxico. Tamén se recibiu informe da Dirección Xeral de Mobilidade, se ben non fai observacións á proposta.

As diferentes administracións informaron no ámbito das súas competencias, incidindo, entre outros aspectos, na valoración das medidas de integración e impermeabilización visual da proposta, e na necesidade de mellorar a inserción paisaxística nos bordos co solo rústico, aspectos que son recollidos no presente documento de alcance.

4. Consideracións para a mellor integración dos aspectos ambientais na modificación

De acordo co proceso de avaliación ambiental estratéxica, a formulación da proposta deberá garantir unha axeitada integración dos aspectos ambientais de cara a contribuír “ao desenvolvemento económico equilibrado e sustentable do territorio, á cohesión social e á mellora da calidade de vida da poboación e á utilización racional do territorio e á sustentabilidade ambiental”, en coherencia co modelo territorial que establecen as Directrices de ordenación do territorio (DOT).

Neste documento de alcance incorpóranse parte das observacións e suxestións con incidencia ambiental recibidos durante o período de consultas previas, porén, o Concello deberá considerar no proceso de elaboración e tramitación da modificación as observacións formuladas.





Neste senso, tendo en conta a documentación achegada (borrador da modificación e documento ambiental estratéxico) e as suxestións recibidas durante a fase de consultas previas, fanse as seguintes consideracións organizadas por variables ambientais na procura dunha mellor integración ambiental da modificación:

Ocupación do territorio

Analizada a proposta, enténdese que a ordenación adopta un modelo de ocupación máis orgánico que se implanta mellor no territorio. Valórase favorablemente o establecemento de polígonos e o condicionamento para a súa execución en función do nivel de consolidación da fase anterior, o que permitirá avaliar as necesidades reais de crecemento e fomentar un consumo do solo máis racional.

Do mesmo xeito, incorpóranse criterios para unha mellor adaptación á topografía e resolución de desniveis que, ao igual que as medidas mencionadas no parágrafo anterior, deberían ser precisadas e incorporadas nas ordenanzas que se redacten, establecendo pautas para evitar os movementos de terra significativos.

Ciclo hídrico

Respecto da rede fluvial e zonas de protección, a modificación do plan parcial identifica a canle fluvial da regueira da Fontenla, cuxa afección non figura na cartografía do PBA. O borrador a integra dentro da zona verde prevista e recolle na memoria as zonas de servidume e de protección.

As técnicas de drenaxe urbano sostible propostas no documento -pavimentos descontinuos e brandos en viarios e zonas de estacionamento, cuberta plana axardinada, porcentaxe mínima de solo drenante en zonas comunitarias, etc-, deberían concretarse e trasladarse á normativa do plan.

En canto á a suficiencia das infraestruturas de abastecemento e saneamento no ámbito, achégase informe da empresa subministradora "Viaqua" no que se indica, entre outros aspectos, a importancia da coordinación entre o SUD-16 e o SUD-17 para a execución no anel San Lázaro-San Marcos -esixido na ficha do PXOM-, a necesidade de aumentar a capacidade do depósito existente para poder garantir o subministro, e a situación de saturación da EDAR de Silvouta.

A este respecto, xustificarase a existencia de recursos hídricos suficientes, debendo prever e cuantificar o aumento da demanda do servizo e concretar as actuacións necesarias para garantir o subministro e depuración, recolléndose os trazados das redes, determinando as conexións cos sistemas xerais existentes, e establecendo a previsión das obras de ampliación e reforzo necesarias¹.

Así mesmo, lémbrese que o informe da Administración hidrolóxica sobre a existencia de recursos hídricos necesarios para satisfacer as novas demandas será determinante para o contido da declaración ambiental estratéxica².

Paisaxe

Valóranse positivamente as medidas para fomentar a continuidade visual da proposta -alturas máximas de muros e valados e condicionantes para os peches das zonas comunitarias- así como para a minimización dos posibles impactos visuais creados -como nos aparcadoiros sobre rasante, ou a posibilidade de axardinamento das cubertas situadas na ladeira do Monte do Viso-. Conviría que estes criterios se concretasen e se trasladasen ás ordenanzas que se redacten.

A modificación permite a diversidade de tipoloxías, deixando aberta a posibilidade de distintas solucións, e prevé situar as vivendas unifamiliares nas zonas máis altas e as vivendas colectivas nas zonas máis baixas de menor visibilidade, favorecendo a integración na paisaxe. No entanto, identifícase unha parcela de bloques residenciais no borde leste en contacto coa contorna rural que,

¹ En cumprimento dos artigos 56.1 c) da Lei 2/2016; 76.2 e 126 do Decreto 143/2016, de 22 de setembro, polo que se aproba o Regulamento da Lei 2/2016, de 10 de febreiro, do solo de Galicia, e da determinación excluínte 4.8.9 das DOT.

² En cumprimento do artigo 22.3 do real Decreto Lexislativo 7/2015.





ademais, se atopan a escasa distancia da AEIP “Carballeira de Bando”. Neste senso, recoméndase seguir as indicacións do Instituto de Estudos do Territorio, que suxire reconsiderar a ordenación, cando menos nesta zona, de xeito que as vivendas unifamiliares, o arboredo e os espazos libres ocupen os bordos co solo rústico, e as edificacións colectivas se integren entre espazos edificadas.

Patrimonio natural

No documento sinálase que no parque fluvial da regueira da Fontenla se conservarán e restaurarán as especies vexetais propias do hábitat do bosque de ribeira, prohibíndose as especies exóticas invasoras, determinacións que sería desexable que se aplicasen tamén no resto de espazos verdes.

Pola outra banda, recóllense medidas de fomento do arborado en espazos privados, de conservación das especies autóctonas, de conectividade ecolóxica, -como o emprego de pavimento discontinuo ou brando nos tramos de viario que atravesen as zonas verdes-, ou de maximización da superficie en estado natural nos espazos libres públicos e privados, que deberían ser concretadas e trasladadas á parte normativa.

Mobilidade

No documento trátase de priorizar ao peón a través de viarios mixtos e itinerarios peonís, auméntase o trazado do carril bici respecto ao plan vixente, e preténdese promover o paso das liñas de transporte público, o que favorecerá unha mobilidade alternativa. Neste senso, aconséllase que o estudo de avaliación da mobilidade³ que se incorpore, sirva de base para concretar as citadas propostas. Así mesmo, recoméndase representar as reservas de espazo de parada para vehículos de transporte colectivo.

Atmosfera e cambio climático

A Lei 21/2013 esixe considerar o cambio climático na avaliación ambiental. A este respecto, a modificación deberá estimar a variación da pegada de carbono asociada ao cambios da ordenación propostos, establecéndose as medidas axeitadas para mitigar a súa incidencia, considerando a información dispoñible⁴.

Segundo o Mapa Estratéxico de Ruído⁵ para a AP-9, detéctanse niveis de inmisión acústica nocturnos elevados na zona noroeste, superando os 50 dB en máis da metade do ámbito, os 55 dB no terzo norte, e mesmo os 60 dB nunha franxa de 80 metros máis próxima á autoestrada, afectando aos espazos libres e vivendas máis próximas.

Neste senso, conviría actualizar e completar o estudio acústico, necesidade que xa se indica no propio documento ambiental estratéxico, e que podería servir de base para o establecemento de limitacións á edificabilidade. Do mesmo xeito, incluírase a delimitación da zonificación acústica do ámbito, así como condicións para garantir o cumprimento dos obxectivos de calidade acústica no interior das vivendas⁶.

Como criterio, suxírese valorar a posibilidade de priorizar a execución dos polígonos máis afastados da autoestrada e menos afectados polo ruído.

³ En cumprimento do artigo 172 do Decreto 143/2016, de 22 de setembro, polo que se aproba o Regulamento da Lei 2/2016, de 10 de febreiro, do solo de Galicia.

⁴ Recoméndase a consulta da “Guía de medidas para a mitigación e adaptación ao cambio climático no planeamento urbanístico” editada pola FEMP, Rede española de cidades polo clima
(http://www.gea21.com/_media/publicaciones/guia_femp_medidas_ccc_planeamiento_urbano.pdf)

⁵ Mapa Estratéxico de Ruído de estradas do Estado en Galicia no marco do Sistema de información de Contaminación Acústica (SICA) correspondente á segunda fase de aplicación (2012).

⁶ Recollidos do Real Decreto 1367/2007, do 19 de outubro, que desenvolve a Lei 37/2003, do 17 de novembro, do ruído, no referente á zonificación acústica, obxectivos de calidade e emisións acústicas.





Enerxía

Promoverase o aforro enerxético e o emprego de enerxías renovables, adoptándose as solucións técnicas que leven consigo un maior aforro de enerxía, así como a adopción de criterios de arquitectura sustentable. No documento propónse que co deseño do alumado público se minimicen as emisións lumínicas e se reduza o consumo enerxético, o que debería recollerse na normativa do plan.

Ciclo de materiais

Recoméndase introducir determinacións que reduzan o consumo de materiais e favorezan o emprego materiais reciclados, reciclables, locais ou tradicionais na construción.

Noutro eido, na modificación propónse a posibilidade de integrar composteiros nos espazos comunitarios dos quinteiros residenciais, o que contribuíría á redución do volume da fracción de materia orgánica dos residuos xerados. A este respecto, conviría que no documento se localizaran os espazos necesarios para os sistemas de recollida selectiva de residuos.

5. Contido, amplitude e nivel de detalle do estudo ambiental estratéxico

O estudo ambiental estratéxico (EAE) é, en esencia, o resultado dos traballos de identificación, descrición e avaliación dos posibles efectos significativos no medio como resultado da aplicación do plan, e debe considerar alternativas razoables aos mesmos que sexan técnica e ambientalmente viables.

Dito documento deberá conter a data da súa conclusión e vir asinado polo seu/s autor/es, especificando a súa titulación, tal e como esixe o artigo 16 da Lei 21/2013.

Atendendo ao contido mínimo que establece o anexo IV da Lei 21/2013, sen prexuízo de que o promotor incorpore cuestións que considere relevantes, o EAE deberá conter:

- Un esbozo do contido, obxectivos principais do planeamento e relacións con outros plans e programas pertinentes (polo menos, coas DOT);
- Os aspectos relevantes da situación actual do ambiente e a súa probable evolución en caso de non se aplicar o planeamento;
- As características ambientais das zonas que poidan verse afectadas de maneira significativa e a súa evolución tendo en conta o cambio climático esperado no prazo de vixencia do planeamento;
- Calquera problema ambiental existente que sexa relevante para a modificación;
- Os obxectivos de protección ambiental fixados nos ámbitos internacional, comunitario ou nacional que garden relación co plan ou programa e a maneira en que tales obxectivos e calquera aspecto ambiental se tiveron en conta durante a súa elaboración;
- Os probables efectos significativos no ambiente, incluídos aspectos como a ocupación do territorio, a paisaxe, a mobilidade, o patrimonio natural, o patrimonio cultural, o ciclo hídrico, a enerxía, o ciclo de materiais, os riscos naturais e antrópicos, a súa incidencia no cambio climático –en particular, unha avaliación adecuada da pegada de carbono asociada ao plan ou programa–, e a interrelación entre estes factores. Estes efectos deben comprender os efectos secundarios, acumulativos, sinérxicos, a curto, medio e longo prazo, permanentes e temporais, positivos e negativos;





- As medidas previstas para previr, reducir e, na medida do posible, compensar calquera efecto negativo importante no ambiente da aplicación do plan ou programa, incluíndo aquelas para mitigar a súa incidencia sobre o cambio climático e permitir a súa adaptación a el;
- Un resumo dos motivos da selección das alternativas consideradas e unha descrición da maneira en que se realizou a avaliación, incluídas as dificultades, como deficiencias técnicas ou falta de coñecementos e experiencia que se poidan ter encontrado para reunir a información requirida;
- Un programa de vixilancia ambiental no que se describan as medidas previstas para o seguimento;
- Un resumo de carácter non técnico da información facilitada en virtude das epígrafes precedentes;
- Cartografía. O EAE deberá incluír todos os planos necesarios para a correcta identificación das alternativas e proposta formuladas así como para a caracterización ambiental do ámbito de actuación e da súa área de influencia: condicións do relevo, patrimonio cultural, espazos de especial interese natural, usos do solo, riscos naturais⁷, cursos fluviais, infraestruturas de abastecemento e de saneamento, entre outros (non será necesario incluír no EAE planos temáticos que deben formar parte da propia documentación da modificación segundo o establecido na lexislación urbanística). A documentación cartográfica que se elabore axustarase ás especificacións técnicas que figuran no apartado “Información cartográfica” da páxina web de avaliación ambiental estratéxica de plans e programas da Consellería de Medio Ambiente, Territorio e Vivenda⁸.

6. Proceso de información pública e consultas

6.1. Modalidade de información pública e consultas

Con carácter previo á aprobación inicial da modificación do plan parcial o Concello de Santiago de Compostela consultará á Dirección Xeral de estradas do Ministerio de Fomento.

Conforme co disposto no artigo 75.1a) da Lei 2/2016, do 10 de febreiro, do solo de Galicia, se o Concello aprobase inicialmente a modificación debería sometela a información pública durante un prazo de dous meses, mediante anuncio que se publicará no *Diario Oficial de Galicia* e nun dos xornais de maior difusión na provincia.

A documentación sometida a información pública abranguerá todos os documentos integrantes do expediente tramitado, incluídos a versión inicial da modificación, un resumo executivo, o estudo ambiental estratéxico e un resumo non técnico do estudo ambiental estratéxico.

Simultaneamente ao trámite de información pública, o Concello ou o órgano competente en materia de urbanismo, segundo corresponda, deberá consultar ás Administracións públicas afectadas e ás persoas interesadas. Sen prexuízo dos demais informes sectoriais que resulten preceptivos de acordo coa lexislación sectorial aplicable, solicitarase informe a:

⁷ Artigo 22.2 do Real Decreto Lexislativo 7/2015

⁸ https://cmatv.xunta.gal/tema/c/CMAOT_Avaliacion_ambiental





Administracións e organismos públicos:

1. Administración da Comunidade Autónoma de Galicia:

- Consellería de Medio Ambiente, Territorio e Vivenda
 - Dirección Xeral de Calidade Ambiental e Cambio Climático
 - Instituto de Estudos do Territorio
- Consellería do Medio Rural
 - Dirección Xeral de Desenvolvemento Rural
- Consellería de Infraestruturas e Mobilidade
 - Augas de Galicia
 - Dirección Xeral de Mobilidade

Público interesado:

- Asociación para a Defensa Ecolóxica de Galiza (ADEGA)
- Sociedade Galega de Historia Natural
- Asociación de propietarios dos SUD-16 e SUD-17

6.2. Integración dos resultados

Tomando en consideración os resultados do trámite de información pública e consultas, o promotor modificará, de ser preciso, o estudo ambiental estratéxico e elaborará a proposta final da modificación do plan parcial. Feito isto, o Concello remitirá ao órgano ambiental o expediente de avaliación ambiental estratéxica completo -en formato dixital- para que formule a declaración ambiental estratéxica (artigos 75.2 e 60.9 da LSG), o cal deberá conter (144.9 do RLSC):

- **Proposta final** da modificación do plan parcial e o **estudo ambiental estratéxico**.
- **Informe de participación pública e consultas** no que se describa o procedemento seguido, a relación de administracións públicas consultadas e persoas interesadas, as datas de solicitude e resposta, así como dos medios empregados para a súa difusión. Conterá un resumo de cada unha das observacións, alegacións e informes recibidos, xustificando como foron tomados en consideración e se integraron no planeamento. Ademais, xuntarase copia dos informes recibidos, incluíndo copia daquelas alegacións que presenten temática ambiental.
- **Documento resumo** no que se describa a integración na proposta final dos aspectos ambientais, do estudo ambiental estratéxico e da súa adecuación ao documento de alcance, do resultado das consultas realizadas e da súa toma en consideración.

Santiago de Compostela, na data da sinatura dixital

Margarita Segade Castro

Xefa do Servizo de Avaliación Ambiental de Plans e Programas





RESOLUCIÓN

Tendo en conta a proposta anterior, RESOLVO formular o documento de alcance do estudo ambiental estratéxico da *Modificación do Plan parcial SUD-16 Agra dos Campos-Aríns, concello de Santiago de Compostela*, en cumprimento do establecido nos artigos 75.2 e 60.4. da Lei 2/2016, do 10 de febreiro, do solo de Galicia.

Esta resolución poñerase a disposición do público na sede electrónica desta Consellería (https://cmatv.xunta.gal/tema/c/CMAOT_Avaliacion_ambiental). Remítirase ao promotor, para que a teña en consideración na elaboración da modificación, e ao Concello de Santiago de Compostela, para que a publique na súa sede electrónica, conforme ao disposto no artigo 144.4 do Regulamento da lei 2/2016 e no artigo 19.3 da Lei 21/2013.

Santiago de Compostela, na data da sinatura dixital

María Cruz Ferreira Costa
Directora Xeral de Calidade Ambiental e Cambio Climático

